

CHRISTOPHORI

FRANZOVII *Biblioth**Collegii* Equitis Holsari *S. Paneratii*

EPISTOLA

*De* AD GEORGIVM CALIXTVM *Urbe**Catalogo* Professore Helmfledenscm *Inscriptus*Qua sui ad Ecclesiam Catholicam  
accessus rationes exponit.*Ex Bibliotheca**S. Paneratii*  
*S. Paneratii**Urbe*  
*Inscriptus*

ROMAE ANNO MDCLI

Typis heredum Ludouici Grignani  
excudit Gregorius Tiberius.

SUPERIORVM PERMISSV.

*Coll. S. Urbe*

5

1844  
1845

1846  
1847

1848  
1849

1850

1851  
1852

1853  
1854

1855

CL. DOCTISSIMOQUE VIRO  
 GEORGIO CALIXTO  
 CHRISTOPHORVS RANZOVIVS

*Sal. plur. dicit, vovetque aeternam.*



ITERAS tuas a. d. vi. Maij  
 datas, doctissime idemque  
 optime Calixte, plane quales  
 sperabam accepi, nempe mo-  
 destiae & humanitatis, tum  
 vero officiosi erga me affectus plenas. In-  
 dicant illae, itidem ut aliae sub idem tem-  
 pus ex patria perlatae, quam solliciti mea  
 de re fuerint homines sui omnium incu-  
 riosissimi: quicum nihil Romae spectatu di-  
 gnum putent praeter publicorum operum,  
 moles, & prisca splendoris indices parie-  
 tinas; nec nisi cum stabularijs, lanistis, &  
 saltatoribus plerique versentur, me viros  
 pios doctosque frequentantem, quibus  
 haec urbs abundat, in fidei catholicae ve-  
 ritatem inquirere aegreferunt. Sed illi de  
 se viderint: ego quidem pro eo quo teneor  
 aeternae felicitatis desiderio, studij humani  
 curiositatem nusquam melius exerceri cre-  
 do, quam in negotio salutis, quae extra

vnam veramque Christi ecclesiam sperari nullo modo potest. Proinde cum hac præcipua Italica: profectionis causa mihi fuerit, sedulo hic disquirendum mihi existimaui de religionis capitibus, quæ septentrionem infelici schismate separant à Romana cæteraque catholica ecclesia. Eamque ad rem peropportuna mihi accidit amicitia Luca: Holstenij, sacerdotis catholici ex Transalbiana nostra; viri & eruditione & humanitate singulari, & in SS. Patrum & Conciliorum lectione versatissimi. In eo præcipue me delectauit, quod ab omni sophistica futilitate & logomachia, abhorreat; quippe qua veritatem Catholicam luce meridiana clariorem, obfuscaritantum tenebrisque inuolui existimat. Eius consilio in discernendis fidei controuersijs regulam Vincentij Lirinensis, quem tua commendatione nosse & amare ceperam, adhibui; scilicet, diuinæ legis auctoritatem, & Ecclesiæ catholicæ traditionem: itaut verum & indubitatum crederem quicquid sacra scriptura docet, dummodo interpretationis eius linea secundum ecclesiastici & catholici sensus normam dirigatur; non iuxta peculiarem cuiuscunque demum veteris aut nouæ sectæ opinionem detorqueatur.

Huius regulæ ductu dubitare non potui, quin ea certissima sacræ scripturæ mens esset, & vera ac genuina ecclesiæ catholicæ doctrina, quam proxime ab Apostolis acceptam probatissimi primorum quinque sæculorum Patres, & quatuor Concilia generalia, quatuor euangelij antiquorum iudicio comparanda, tradiderunt: tum etiam quod supparet iisdem temporibus historiæ ecclesiasticæ auctores scripto nobis consignatum vnanimi consensu reliquerunt: nec aliunde primitivæ Ecclesiæ sensum clarius certiusque erui posse existimaui. Ita ut, quæcumque primis istis sæculis in dogmatibus fidei, ecclesiæ sacramentis, eorumque usu & ritibus; tum etiam in politia & disciplina publica, ubique, semper, & ab omnibus credita, probata, & usitata fuisse certo sciam, ea pro veris, & catholicis dogmatibus, sacramentis, ritibus, legibusque ecclesiasticis amplectar & teneam. E contra eos, qui vel olim publicam istam vniuersæ ecclesiæ doctrinam perniciousiter negarunt, adulterarunt, impugnarunt; vel hoc tempore, veterum quorundam exemplo, negant aut impugnant; ideoque Ecclesiæ communionem deferunt; hæreticos, schismaticos, novatores, & Ecclesiæ perturbatores fuisse,

atque etiam nunc esse pronunciare non verear.

Quocirca primum ac præcipuum huius disquisitionis caput esse duxi, ut in ipsius Ecclesiæ nomen, naturam, & notas siue attributa sedulo inquirerem; quæ secundum Apostolum, domus Dei est, columna & firmamentum veritatis: & iuxta fidei symbolum, vna, sancta, Catholica, & Apostolica credi debet. Principio enim nisi vna sit, Ecclesia esse nequaquam potest. Cum enim corpus sit Christi capitis sui; vnus autem capitis non nisi corpus vnum esse possit, vnâ tantum, quacumque diffunditur, Ecclesiam esse necesse est. Ea autem vnitas vnus eiusdemque fidei veritate, eorundem sacramentorum communione, pacis denique & concordie communis vinculo continetur. Ideoque vbi fides diuersa est, & sacramenta non eadem celebrantur, neque coniuncta vnus fraternitatis in vna Dei domo cohabitatio, ibi Ecclesia vna non est. Vnde iam olim hæc de pronuntiauit Cyprianus: Deus vnus est, & Christus vnus, & vna Ecclesia eius, & fides vna, & plebs in solidam corporis vnitatem concordie glutino copulata. Scindi vnitas non potest: nec corpus vnum diffidio compaginis separari, diuul-

sis laceratione visceribus in frustra discerpi.  
Quicquid enim à matrice discesserit, seorsim vivere & spirare non poterit, substantiam salutis amittit. Ex quo sequitur Catholicam ecclesiam, quæ præcipua à parte Romana dicitur, cum Lutherana, Caluianiana, vel Anabaptistica vnam eandemque ecclesiam nec esse, nec fingi posse. Cum istæ non solum ab ea discrepent multis fidei capitibus, diuersisque sacramentis; sed hostili quoque odio dissideant. Omnes enim istæ sectæ à Romana ecclesiâ eam ob causam superiori sæculo se disiunxerunt, quod non Ecclesiam Dei, sed satanæ regnum, & Antichristi sedem, atque ipsissimam Babylonem eam existimarent; ideoque Luthero classicum canente, omnibus salutem in Christo sperantibus, & animo & corpore fugiendam crederent. Neque hætenus susceptum semel odium posuerunt. cum hoc ipso tempore Ecclesiæ hostes rerum potiti, templa Catholicorum inuadant, bonis spolient, episcopatus supprimant, monasteria subuertant, suæque sectæ doctrinam Catholicæ fidei abrogatæ substituunt.

Sanctam quoque credimus & profiteamur Ecclesiam, quam Christus ipse, teste Apostolo, sanguine suo sanctificauit, mundans eam

## *Epistola*

lauacro aquæ in verbo, vt exhiberet ipsam sibi gloriosam, non habentem maculam aut rugam, aut aliquid huiusmodi, sed vt sit sancta & immaculata. Quod cum Augustino retr. l. 1. c. 18. & alibi, ita intelligimus, non quasi iam sit, sed quæ preparatur vt sit, quando apparebit etiam gloriosa. Sancta tamen quam Spiritus sanctus Christi Domini, vt cum Tertulliano loquar, vicarius nunquam deseruit, nunquam deseret; sed virtutum vbertate fecundat, & sanctitatis magistram populo Dei constituit. Sane cum singulari Dei instinctu animus meus inde à puero ad veram pietatem anhelaret, & pauca à nostris scripta reperirem igni illi cælesti fouendo opportuna, quo diuini amoris incendium exardesceret; oblati mihi tunc catholicorum scriptorum meditationibus sacris, cœpistatim persentiscere, quanto sauius vberiusque Ecclesiæ illius filij de matris suæ vberibus Spiritus dulcedinem, & pietatis nutrimentum sugerent, quam qui externæ nutricis exsuccas & arentes mammas inani labore fatigant. Eoque prima mihi de Ecclesiæ illius statu cognoscendo suborta est cogitatio. neque enim verisimile videbatur in ea arbore fidei medullam exaruisse, quæ tam vberes pietatis fructus gigneret.



Atque istam tunc coniecturam minime  
me fecisse abunde deinceps Catholico-  
rum hominum usu & conuersatione ex-  
pertus sum; maxime cum ad urbem access-  
issem. Nam ubi tu superstitionibus, nu-  
gis, & nouitatibus me offensum iri existi-  
masti, ibi insperato planeque admirando  
spectaculo vniuersa Catholica Ecclesia  
facies antiquæ pietatis sanctitatisque  
plena, oculis animoque meo se se aperuit,  
in ipso Iubilei, quod INNOCENTIVS X.  
Pont. Max. orbi Christiano indixerat,  
principio. Vidi enim solemnî supplica-  
tionis ritu ad Basilicam Vaticanam  
procedentes numerosissimas infantum  
scholas, agmina monachorum, & religio-  
sorum hominum sodalitia; inde collegia  
diuersa clericorum, & Ecclesiarum presby-  
teria. Clerum suum sequebatur Pontifex,  
veneranda Episcoporum corona circumfu-  
sus. Hunc populi Christiani ducem, & an-  
tistitem supremum immensa fidelium tur-  
ba subsequabatur, eo animi ardore, ut cæ-  
lum ipsum expugnaturi, manuque violen-  
ta direpturi viderentur, homines pleri-  
que omnes sacco tantum & cilicio testi,  
& scipione viatorio armati. Vbi in porti-  
cum ad limen Ecclesiæ peruentum, Pon-  
tifex in genua prouolutus, cum oratione su-

per plebem data misericordiam diuinam implorasset; occlusas valuas non tam apertans, quam diruens, primus templum ingreditur, rectaque pergit ad altare, preces solemnes inchoaturus. Interim non sine stupore spectavi, quo impetu populus ille ingens in Ecclesiam irrueret, limina certatim exosculantes, genibusque perrepantes: templum ingressi pars in terram proni, totoque prostrati corpore, pars B. Petri, ut vocant, Confessioni, & altaribus prouoluti, lacrimas precesque funderent; & ad misericordiam Dei extorquendam non tam pectus palmis, quam celum ipsum inuidia tunderent. Hæc fateor noua tum visa mihi, cui nihil simile apud nostros antea obseruatum; ubi homines ad orationem genuflexi non nisi in sepulcrorum memorijs picti sculptiue conspiciuntur. Sed nouitas illa clarissimum antiquæ sanctitatis indicium mihi præbuit: vnde Ecclesiam etiam nunc vitali vigore Spiritus sancti vegetari, regique certo perspicirem. Eaque in sententia magis confirmatus sum, ubi populum illum agmine immenso, & continua serie cæteras Ecclesias, precibus stationibusque præstitutas, obeuntem vidi; supplicationibus interim, & litanijs suo quosque ordine, sed vno coniunctoque pietatis cer-

tamine diuinam opem expoicentes. Tum  
vero perspexi, quanta pietatis æmulatione  
peregrini ad Urbem confluentes & publi-  
cis Ecclesiæ, & suæ quique nationis priuatis  
hospitijs excipiantur: ad hæc quo studio  
curaque foueantur ægroti, quod fidem  
propemodum omnem excedit.

In tanto populorum & nationum nume-  
ro facile perspexi, quid Catholica eccle-  
sia a sectis factionibusque priuatis distet:  
cum hic omnes gentes omnesque linguæ  
vnius fidei & caritatis vinculo socientur;  
apud istos vniuseiusdemque ciuitatis po-  
pulus, sæpe etiam familiæ singulæ, opinio-  
num & parietum diuertigio separatæ, suo  
quique in angulo Ecclesiam coarctatam  
existiment, cæterosque vt extorres ac  
profanos ferali odio auersentur.

Christus Dominus omnes gentes, &  
extremos terræ terminos hereditatem  
& possessionem à Patre accepit. patrimo-  
nium hoc amplissimum integrum, nec mi-  
nuendum vnquam, tabulis dotalibus san-  
guine suo obsignatis sponsæ unicæ contulit.  
Proinde mirandum, cum S. Augustino, qua-  
lem vesaniam patiantur hæretici, qui præ-  
cisi à compagine Ecclesiæ Christi, & par-  
tem tenentes, & totum amittentes, nolunt  
communicare orbi terrarum, quo diffusa.

est gloria Christi; cui comunicat catholica Ecclesia. Etenim Christianorum cum sint hæreses plures, atque omnes se catholicos velint videri, aliosque præter se hæreticos nominent; vna est Ecclesia catholica, cui hæreses aliæ diuersa nomina imponunt, cum ipsæ singulæ proprijs vocabulis, quæ negare non audeant, appellentur. Huius igitur Ecclesiæ tenenda est nobis communicatio, quæ Catholica est, & Catholica nominatur, non solum à suis, sed etiam ab omnibus inimicis. Velint enim nolint ipsi quoque hæretici & schismatum alumni, quando non cum suis, sed cum extraneis loquuntur, catholicam nihil aliud quam catholicam vocant. Non enim possunt intelligi, nisi hoc eam nomine discernant, quo ab vniuerso orbe nuncupatur. Hæc sola Ecclesia nos Deo seruat, hæc filios regno, quos generauit assignat. quisquis ab ea segregatus adulteræ iungitur, à promissis Ecclesiæ separatur. Eius vnitatem, qui non tenet, Dei legem non tenet, non tenet Patris & Filij fidem, vitam non tenet & salutem. Quocirca, inquit, si tibi angelus de cælo diceret: Dimitte Christianitatem orbis terræ, & tene partes Donati, (hoc est Lutheri vel Caluini), anathema esse deberet: quia te à toto præcidere, & in partem con-

trudere conaretur, & alienare à promissis Dei. Ecclesia sponsa Christi est, ut ait idem Augustinus, totum possidet quod à viro suo accepit in dote. Quæcunque congregatio cuiuslibet hæresis in angulo sedet, concubina est, non matrona. iactet se cum spuria prole contra Ecclesiam, & ancilla procax dominæ conuitia & iniurias ingerat; eiicietur tamen cum filiis suis, qui utcunque nunc Christi patrimonium sibi arrogent, hæredes cum filiis liberæ numquam erunt. Neque enim Deum patrem habere potest, qui non habet matrem Ecclesiam.

Et nequis hanc matrem fidelium, arcam salutis, & Christi tabernaculum ignorare posset, in sole illud posuit, deditque in lucem gentium: atque ut Dei ciuitas conspicua appareret omnibus, in montis vertice eam eminere voluit. Quomodo enim gentes in tenebris & umbra mortis sedentes ad eam conuerterentur, si veritatis luce extincta errorum nox ipsam oppressisset; vel admota Diogenis laterna in angulis esset quærenda? Ecclesiarum origines euoluenti omnium sæculorum exempla occurrunt, quam fidei & religionis matricem & magistram singulæ agnoscant. Taceo Britanniam, quatenus Angli Saxonesque

noſtri eam occupant, S. Gregorij magni apoſtolatu per Auguſtinum ſociosque monachos Euangelij luce perfuſam. Cogita Saxoniam noſtram Cifmarinam cum prouincijs vicinis ad intimum ſeptentrionem porrectis, & extremam Thulen, S. Anſcharij prædicatione Catholicæ eccleſiæ adiectam. Cogita reliquam tranſrhenanam Germaniam, quæ extra veteris Romani imperij limitem fuit, Bonifatij, VVillebrordi, Suiberti, & VVilhadi, aliorumque ſanctiſſimorum hominum labore, & induſtria ad catholicæ fidei agnitionem, & Eccleſiæ vniuerſalis communionem perductam. Nunquid ea tunc inuiſibilis latebat Eccleſia, quæ Apoſtolicos viros prædicationis munere legitime inſtructos eo miſit? quæ recens fundatis eccleſijs Episcopos ordinauit? quæ ritus legesque eccleſiaſticas, omnemque diſciplinam ſacram iſdem tradidit? Si recentiora tempora ſpectemus, miraculo euidenti non caruit, quod aorum memoria de America, de vltima Africæ ora, & de Indiæ remotiſſimis prouincijs inſulisque factum ſcimus. Subtraxerat Eccleſiæ catholicæ veritatis hoſtis prouincias & regna, quæ ad Septentrionem vergunt, & vniuerſalis Eccleſiæ membra non ita pridem nobiliſſima in partes ſectasque va-

rias discerperat ; ita vt Christi patrimonio non exigua parte mutilatum videri poterat : cum repente veritatis sol , cui peruersum & obstinatum animum homines factiosi occluserant , prouiucijs quas dixi remotissimis , & dira barbarie effertis exoritur , suoque lumine longe lateque omnia perfundit : vbi nunc regna , & prouinciæ propemodum infinitæ Christi iugo colla submiserunt ; & religio catholica per metropoles , episcopatus , academias celeberrimas , & religiosorum hominum collegia infinita , lætissima propagine diffusa floret . Quis vero nescit , quibus auspicijs , qua auctoritate , quorum opera & ministerio id factum ? Neque enim ex latebris noui & incogniti prædicatores emerfere , quod auorum memoria apud nos contigisse scimus ; sed Pontificum , regumque Catholicorum studio agmina operariorum ad nouam messem , ex Catholicæ ecclesiæ gremio fuere submissa . Neque nunc obscurum vlli est , vnde missionarij ad fidei Catholicæ reliquias inter hæreticos & schismaticos tuendas , vel veritatem de integro apud infideles propagandam submittantur , qui omnium nationum collegia , non solum Romæ , sed per cæteras omnes orbis prouincias , etiam in Iaponia , sub primo solis or-

tu à Pontificibus Romanis fundata non ignorat. Hoc catholicæ Ecclesiæ studium, hanc Pontificum, hanc Cardinalium curam vel præcipuam hic esse sciunt, qui sine odio & inuidia res Romanas inspiciunt. Neque eam inanem esse nostro hoc tempore patitur Deus, quum non ita pridem certo nuntio ex Oriente perlatum sit, Sinarum Regem cum familia & nobilitate præcipua, Christi fidem suscepisse, principumque exemplo myriades hominum passim ad baptismum properare: ita ut competentibus catechizandis vix omnes per Europam sacerdotes, si eo mitterentur, suffecturi videantur.

Denique Apostolicam eandem Ecclesiam symboli definitione profitemur, eo quod originem, & successionem ab Apostolis continua serie deductam usque in finem seruet. Constat enim, inquit Tertullianus, quod Christus Iesus dominus noster duodecim Apostolos, quos hæc appellatio missos interpretatur, lateri suo adlegerit, destinatos nationibus magistros, ad Patrem regrediens iussit ire, & docere nationes tingendas in Patrem, & Filium, & Spiritum sanctum. Tam etiam quod Apostoli consecuti promissam virtutem Spiritus sancti ad virtutes & eloquium, primo per Iudeam



contestata fide in Iesum Christum, & ecclesijs institutis, dehinc in orbem profecti, eandem doctrinam eiusdem fidei nationibus promulgauerunt; & proinde Ecclesias apud vnamquamque ciuitatem condiderunt: e quibus traduces fidei, & semina doctrinæ cæteræ exinde Ecclesiæ mutuata sunt, & quotidie mutantur, vt Ecclesiæ fiant, ac per hoc & ipsæ Apostolicæ deputantur, vt soboles Apostolicarum Ecclesiarum. Omne enim genus ad originem suam censeatur necesse est. Itaque tot ac tantæ Ecclesiæ vna est illa ab Apostolis prima, ex quâ omnes; & sic omnes primæ, & omnes Apostolicæ, dum vnâ omnes probant vnitatem. Constat proinde omnem doctrinam, quæ cum illis ecclesijs Apostolicis, matricibus & originalibus fidei, conspirat, veritati deputandam; id sine dubio tenentem, quod Ecclesia ab Apostolis, Apostoli à Christo, Christus à Deo suscepit. Reliquam vero omnem doctrinam de mendacio præiudicandam, quæ sapiat contra veritatem Ecclesiarum, & Apostolorum, & Christi, & Dei. Hec ille.

Vnde facile perspexi; Septentrionalem nostram Ecclesiam, quamdiu eam fidei doctrinam & ordinationem retinuit, quam S. Anshario prædicante ab Apostolica se-

de susceperat, vere Catholicam, vere Apostolicam fuisse; quippe ab Apostolico viro fundata, cui petente Ludouico Pio Gregorius IV. Sedis apostolicę præsul ante corpus & Confessionem S. Petri, publicam gentibus septentrionalibus euangelizandi auctoritatem tribuerat. Sed cum post annos paulo minus DCC eadem prouincia per Lutheri emissarios, quorum præcipuus apud nos fuit Ioannes Pomeranus, in partem sectamque peculiarem pertraherentur; & noui isti prædicatores, veteri fide & disciplina partim abrogata, partim interpolata, Ecclesias cathedrasque Episcoporum, qui vel exilio vel carcere mulctati decesserunt, inuaderent; & homines à se ipsis orti, nouo more, sine episcopali ordinatione collegas & successores sibi constituerent; dubium non est, quin Apostolicę successionis serie interrupta: eadem Ecclesia ex Catholica & Apostolica in hæreticam Lutheranam conuersa fuerit: vti etiam Cisalbiana vestra, quam à Suiberto & VVilhado Gregorij II. & Hadriani I. Apostolicorum Præsulum auctoritate fundatam, eadem pestis postea afflauit, & subuertit.

Dixi Ecclesias nostras Septentrionales Apostolicę doctrinę propaginem ex Romana

na

na accepisse, quam Apostolicam fuisse, atque etiam nunc esse, nemo vnquam sanus dubitauit: quinimo vt omnium apostolicarum maxima & antiquissima, honoris prerogatiuam præcipuam semper obtinuit. Eius potentio rem principalitatem statim post Apostolorum tempora agnouit Irengus. Eam statu felicem pronunciat Tertullianus, cui totam doctrinam Apostoli cum sanguine profuderunt; atque inde Africanis quoque ecclesijs suam auctoritatem præsto fuisse testatur; eo scilicet, quod doctrinam fidemque ex ea acceperit, ideoque vt matrem & magistram coluerit vniuersa Africa. Hanc Petri cathedram atque ecclesiam principalem; hanc ecclesiæ Catholicæ radicem & matricem agnoscit Cyprianus. In ea semper apostolicæ cathedræ principatum viguisse affirmat Augustinus. Vnde vniuersa antiquitas hanc Sedē Apostolicam proprio & absoluto nomine semper appellauit, & Episcopo ipsius Domni Apostolici titulum peculiarem tribuit. Ex ea vnitas sacerdotalis exorta est, teste Cypriano: quia Christus, vt sanctus ille martyr loquitur, super vnum Petrum ædificat ecclesiam suam, & illi pascendas mandat oues suas; & vt vnitatem manifestaret, vnā cathedram cōstituit, & vnitatis eius-

dem originem ab vno incipientem sua auctoritate disposuit . Et in pari consortio honoris & potestatis, præ ceteris Apostolis primatus Petro datur, vt vna Christi ecclesia, & cathedra vna monstretur.

Ob hunc primatum, siue potentio rem, principalitatem Romanę sedis, necesse est ad eam omnem conuenire ecclesiam; hoc est, eos qui sunt vndique fideles, vt iam olim pronuntiauit Irenæus: ita vt catholicus censi nullo modo possit, qui eius ecclesię communionem non fruitur. Hanc Petri vnitatem qui non tenet, inquit Cyprianus, tenere se fidem credit? qui cathedram Petri, super quam est ecclesia fundata, deserit, in ecclesia se esse confidit? Nec quenquam latere potest historię ecclesiasticę paulo peritior, quam solícite olim Orientalium ecclesiarum episcopi de statu suo periclitantes, Romanę sedi fidem suam probare studuerint, eiusque exambierint communionem; vt ecclesias, vel saluas retinerent, vel amissas recuperarent. Hanc primam sedem ob eundem primatum nullius inferioris iudicio obnoxiam ceteræ omnes iudicem supremam in causis ecclesiasticis agnouerunt. ad eam à conciliorum vel collegarum sententijs prouocarunt; iniurijs pulsati eius poposcerunt auxilium,

quod Petrus & Athanasius Alexandrinæ, Meletius & Paulus Antiocheng, Paulus & Ioannes Chrysostomus CPolitanæ ecclesię Patriarchę efficac & opportunum experti sunt. E contra Dioscorum Alexandrinum ideo ab vniuerso Chalcedonensi concilio damnatum depositumque legimus, quod excommunicationis sententiam S. Leoni intentans, primam sedem iniuria contumeliaque affecisset. Hunc primatum Christianissimi quiq; Imperatores agnuerunt. Ideoque Theodosius maior Nestarij Patriarchæ CPni electionem, quamuis ab vniuersali concilio Constpnõ factam, à sede Romana confirmari voluit; eique formatam à Damaso PP. regulariter dirigi poposcit, vt testatur Bonifatius PP. I. Eodem modo iunior Theodosius cum Proclum ex Cyzicena ecclesia ad Constpnam transferri cuperet, prolatis Cęlestini PP. I. literis, quibus eam translationem pridem probarat, facile suo desiderio potitus est.

Sed cum tu nostro tempore Gręcos Romanæ sedis primatu iure offendi existimes, mox Orientalis ecclesię mentem accuratius peruestigatam explicabo: vnum interim addam; supremam semper fuisse sedis Romanę auctoritatem in conuocandis dirigendisq; episcoporum concilijs, quibus vel ipsi Pon-

zifices per se, vel per legatos à latere missos vel per diœcesium primates, vicarios suos, præsidebant. cuiusmodi Vicariatu per Illyricum Thessalonicensem, per Gallias Arelatensem, per Hispaniam Tarraconensem & Bracarensem olim functos fuisse, indubitata antiquitatis testimonijs constat. Quali etiam postea per Germaniam Bonifatius Moguntinus, per septentrionem Anscharius, eiusque aliquandiu successores; per Angliam Cantuariensis, alibi alij ex veteri instituto ac priuilegio fungebantur. Nec minus absoluta fuit Episcopi Romani in Conciliorum decretis vel confirmandis vel reprobandis auctoritas; quod Constpni. I, Ephesini, & Chalcedonensis generalium conciliorum synodicę ad Damasum, Celestinum, & Leonem magnū perspicue docent. Hæc qui in tanta sacrae eruditionis luce vel negare, vel sophismatum tenebris obfuscare ausit, ei vel iudicium, vel pudorem omnem deperisse dixerim. Quamuis tu Hildebrandicis dictatis hæc accensere non verearis, & quasi noua fidei dogmata ad catholici nominis inuidiam exagites! Sed cum hac etiam parte à R. P. Ebermanno in Moguntinis disputationibus satis tibi neruose responsum sciam, hoc interim Cato- ne contenti erimus.

*Chr. Ranzouij. 21*

Hęc, quam exposui, rationum summa est, cur Romanam Ecclesiam pro Vna illa, Sancta, Catholica, & Apostolica agnouerim, quam fidei symbolo profiteamur; & cur eius gremio atque communioni tuto me commiserim. Vnde vice versa omnes extra eam congregationes, quocunque demum reformationis nomine gloriantur, aut quacunque puritatis specie sibi blandiantur, vt hæreticorum latibula detestor: eaque vt nullum nunc cum catholica ecclesia in tertis militante, ita neq; in posterum cum triumphante in celorum regno partem habitura certissime credo.

Verum enim uero illud vehementer miror, quod cum hoc ad ecclesiam Catholicam accessu omnibus eius per vniuersum orbem membris me coniunxerim, tu contra ab iisdem me separatum existimes: eaque in re quam rationem sequaris, me non satis perspicere ingenue fateor. Nisi quod tu ecclesiam ex diuersis sectarum factionibus ita vnum in corpus conglutinatam existimas, vt quamuis omnes catholicæ e diametro aduersentur, inter se tamen occulto aliquo symbolo aut sympathia arcana, ipso scilicet catholicæ veritatis odio, ita sint colligatæ, vt qui vnā neget, omnes neget. Sed cum pu-

rus purus Lutheranismus, tua quidem opinione, angustissimis limitibus contineatur, vna scilicet & altera Saxonie nostrę prefectura, quotam quęso ille orbis partem occupat, vt cum Catholicorum regionibus, Italia, Gallia, Hispania, Polonia, Germanię & Belgij parte maxima, tum vero cum America, India Orientali, & latissimis Africę regnis, denique cum Gręcia, & Oriente, quarum maxima pars in catholica communione etiam hodie persistit, comparari queat?

Neque vero cum Lutheranismō caritatem & tolerantiam Christianam simul ciuravi, vt tu suspicari videris; eo quod cum sectę omnes mutuo se scabant ferantq; inuicem, soli catholici cęteros omnes diuersa sentientes anathemate defigant. Non ego Augustanam confessionem hic tibi opponam, vbi fere omnium articulorum epiphonema est: Et damnamus secus sentientes: hoc dicam; cum nulla sit communicatio lucis cum tenebris, Christi cum Belial; cur veritatem catholicam amplexus hæreticorum oppositionibus contra vniuersalia, hoc est, ab omnibus, semper, & vbique credita dogmata, anathema dicere verear? Paulus fidem Galatis semel traditam non alio munimento securam præstari posse existi-



mabat, quam ut aliter docentibus anathema intentaret; idque non solum quibusque de vulgo preconibus, sed etiam Apostolis & Angelis ipsis. Ecclesia hortus ille est conclusus, ex Canticis, ad quem heresi aditus non patet. hæc vinea euangelica, quam Dominus ab operarijs probe excultam, plantisque fructiferis confitam, ad fures ferasque siluestres arcendas sepe circumdedit. Et tu miraris, si maceriem illam sartam rectam conseruare omni ope studeat, si dirui perfodique prohibeat is, quem vineę suę Dominus suprema cum auctoritate preposuit? Profecto ut erroris in se, ita iniquitatis in nos rei sunt, qui cum terminos a Patribus constitutos pro libitu mouere, limites confundere, fines exarare, siluam non suam cedere, in alienam messem falcem immittere, peruerso & pertinaci animo palam audeant; vim sibi & iniuriam fieri queruntur, si alieno prohibeantur, si iuris violati postulentur.

Sed tu intra symboli articulos catholicę veritatis terminos stare existimas. quę illo expresse definita non sunt, nullam certam credendi legem, sed promiscuam habere sentiendi licentiam; quę nouis ecclesię definitionibus constringi coarctarique non debeat. Sed minime nouum hoc aut info-

lens effugium. Nestorius cum temeritate veritatis catholice accusaretur, fidei symbolum obtendebat, quod *συνέκρυ* vocem non agnosceret; illud se profiteri aiebat. Sed Cyrillus id satis esse negat. nam etsi symbolum voce tenus profiteri videretur, non tamen recte illud ipsum intelligere, neque sincere, sed peruerse & preposterè interpretari. Ideoque necessum esse ut ea omnia scriptis execraretur, & anathematizaret, & publice abiuraret, quæ scelestæ, & profane hærenus ipse senserat, aliosque docuerat: eumque in finem duodecim anathematismos eidem præscribit, quibus errorem suum execraretur. Hisce anathematismis Cyrilli non solum Nestorius alios XII e diametro pugnantes opposuit; sed Ioannes Antiochenus cum assensu eisdem ut heretica impietate refertos damnauit. Theodoretus quoque & suo & Orientalium episcoporum nomine, contradictionibus totidem impugnauit. Stetit tamen immobilis catholica veritas, & Cyrilli anathematismos eidem stabiliendæ scriptos, vniuersa Dei Ecclesia approbavit, utcunque principio noui durique multis viderentur.

Hoc vnum namq; ut Vincentius Lirinensis iam olim dixit, omni industria semper studuit Ecclesia catholica, ut vetera fideliter

fapienterque, si quæ sunt illa antiquitus informata & inchoata accuret & poliat; si qua iam expressa & enucleata, consolidet & firmet; si qua iam confirmata & definita, custodiat. Imitatur enim animarum religio rationem corporum; quæ licet annorum processu numeros suos euoluant & explicent, eadem tamen quæ erant permanent. Easdem profectum leges Christianæ religionis doctrina sequitur, ut annis scilicet consolidetur, dilatetur tempore, sublimetur ætate; incorrupta tamen illibataque permaneat. cum nihil propterea in dogmatibus permutationis admittat; nulla proprietatis dispendia, nullam sustineat definitionis varietatem. Fas est enim ut prisca illa cælestis philosophiæ dogmata processu temporis excurentur, limite ntur, poliantur; sed nefas est ut commutentur, nefas ut detruncentur, ut mutilentur. Accipiant licet euidentiã, lucem, distinctionem; sed retineant necesse est plenitudinem, integritatem, proprietatem. Nullius ergo nouitatis insimulanda est Ecclesia, sedula & cauta depositorum apud se dogmatum custos, si subinde hereticorum nouitatibus excitata, conciliorum nouis strictioribusq; decretis veterem fidem asserere, & à corruptelis vindicare euisa fuerit, etiam sub

anathematis denuntiatione . Quo illud tantum perfecit, vt quod antea simpliciter credebatur , postea crederetur diligentius : quod antea lentius prædicabatur, hoc idem postea instantius prædicaretur : & quod ipsa prius à maioribus sola traditione acceperat , hoc deinde posteris etiam per scripturæ chirographum consignaret . Neque vero hereticorum hic curanda est oblocutio , neque eorum in gratiam vel apex vnus de rectis fidei decretis demendus vel mutandus . Nam si semel admissa fuerit hæc licentia, quis non videt, quantum excindendæ atque abolendæ religionis periculum consequatur ? Abdicata enim qualibet parte catholici dogmatis, alię quoque atque item alię partes iam quasi ex more & licito abdicabuntur ; ita vt nihil posthac apud ecclesiam relinquatur intactum, nihil illibatum, nihil integrum . Hęc auctoris tibi notissimi sensu verbisque paulo prolixius exposui, quia plane ad rem nostram faciunt . Nolles enim Lutheranis omnem pro libitu sentiendi licentiam strictis illis concilij Tridentini decretis ademptam, in multis fidei dogmatibus, quę cum eorum confessione vel hypotyposi non congruunt, Sed idem reliqui omnes sectarij conquerentur,

Omnibusergo ex æquo gratificandum erat?  
ficcine vero sacrum illud fidei depositum  
integrum illæsumque posteris seruetur?

Sane nullam maiorem Tridentinis pa-  
tribus curam fuisse scio, quam vt omnia  
ipsorum decreta ad primitiue antiquitatis  
sententiam exactissime conformarentur.  
quod quamviste contra Veneti sannionis  
& Spalatensis apostatę opinionem egre-  
crediturum sciam; crederes tamen, si Gu-  
lielmi Sirleti; tunc Vaticanę bibliothecę  
pręfecti, epistolarum volumina mecum hic  
inspexisses; quibus ille singulis fere septi-  
manis ad Marcellum Ceruinum, Seripan-  
dum, aliosque concilij pręsides Cardinales  
prolixè perscribebat, quęcumque de sin-  
gulis fidei capitibus ex SS. Patrum, prę-  
sertim Gręcorum operibus, tunc maximam  
partem ineditis, diurno nocturnoque stu-  
dio colligere poterat: eaque opera prę-  
cipue purpurę dignitatem meruit. Et sane  
pręclara est, & in publicum proferri ope-  
rę pretium foret: appareret enim omnibus  
perspicue, quam diuersos totoque cęlo di-  
stantes polos spectarint Augustanę confes-  
sionis Concordięque auctores, atque ex-  
aduerso Tridentini patres auitę fidei de-  
fensores. Nanque hic, solam cęlestis veri-  
tatis cynosuram respiciens,

— *semper sublimis ; at illum  
Sub pedibus nox atra videt , manesque pro-*  
*fundi .*

Sane qui tuas aduersus catholicam fidem disputationes recte expendunt , eandem plane litem ecclesiæ te mouere facile perspiciunt , qua Pyrrhonij dogmaticos olim exercuerunt . Nam sceptici , vt acatelepsiam & epochen suam tuerentur , etiam certissima sapiētum decreta vocabant in dubium , adeoque omnia indefinita & incomprehensibilia pronutiabant . neque enim magis hoc , quam illud esse ; & omni rationi rationem æqualem opponi posse existimabant . Eodem modo cum sacra antiquitate agis . nulla tam clara & certa sunt SS. Patrum dogmata , nulla tam sancta conciliorum decreta , quæ non conuellantur ratiunculis , vel ex dubio aliquo , vel male intellecto , aut perperam explicato loco deductis . Ita nunc omnis veterum theologia mera tibi sceptsis est ; adeoque largiter peccasse putas ecclesiam , quæ accepta à Patribus dogmata , ab hereticorum peruicacia anathematis denuntiatione vindicanda censuerit ; in quibus scilicet leuia & exigui momenti permulta tibi videntur , quæ vtrum credas , aut non credas , vel quo pacto credas , parum intersit .

In his primo loco ponis Purgatorium, cuius non solum res, sed & nomen ipsum nostros homines vehementer offendit; ideoque non minores ob sublatum purgatorium Lutheri gratias se debere existimant, quam Lucretius Epicuro suo,

— qui cum vita iaceret

*In terris oppressa graui sub religione,  
Primum Graius homo mortales tollere contra  
Est oculos ausus, primusque obsistere contra.*

Docuitque suos affeclas,

*Vt metus ille foras præceps Acherontis agendus  
Inditus, humanam qui vitam turbat ab imo.*

Sed vtcunque illis explodendum videatur hoc dogma, certum est, antiquissimum & vniuersale semper fuisse in primitiua ecclesia; ideoque non sine ratione concilium anathemate id stabiliendum duxit: cum triplici ex capite veritas eius asseratur. Primo ex sacris literis, Matth. 5. vbi carceris nomine appellatur, in quo satisfiat vsque ad nouissimum quadrantem: tum prima ad Corinthios 3. vbi quosdam ita saluos futuros scribit Apostolus, quasi per ignem. Nititur deinde auctoritate præceptorum doctorum ecclesie tam græcæ, quàm latinæ, qui prædicta loca scripturæ vnanimi consensu de purgatorio sunt ininterpre-  
tati. In Græcis agmen ducunt S. Basilii,

ad caput 9. Isaia hac de re prolixè agens; & libro de Spiritu sancto ad Amphilo-  
 chium cap. 15. Gregorius Nazianzenus  
 & Nyssen in diuersis orationibus. Basi-  
 lius Seleuc. orat. 4. de Dauide. Isidorus  
 Pelus. lib. 5. epist. 350. & Ioannes Chryso-  
 stomus tom. 6. sermone pro defunctis, ho-  
 mil. 21. in Acta, & homil. 3. in epist. ad  
 Philippenes: quæ loca Io. Mattheus Caryo-  
 philus Iconiensis antistes Zacchariæ Ger-  
 gani græculi nugis erudite opponit. Cum  
 doctoribus græcis paria faciunt latini. S.  
 Ambrosius in locum Apostoli 1. Cor. &  
 Hieronymus in 4. caput Amos. Augustini  
 autem loca omnia vel obiter indicare pro-  
 lixum foret: cum neminem antiquorum  
 plura, vel clariora hac de re scripsisse con-  
 stet, vt vnus instar omnium esse possit. Ter-  
 tia ratio est analogia fidei, & sensus perpe-  
 tuus vniuersæ ecclesiæ in precibus & obla-  
 tionibus incruenti sacrificiij pro defunctis  
 offerendis; quod & ipse aliquoties te affir-  
 mantem audiui. hæc autem vana & irrita  
 essent, nisi animas tali in statu & loco com-  
 morari credidisset antiquitas, vbi Ecclesiæ  
 suffragijs subleuari possent. Tum etiam in  
 veteris pœnitentiæ disciplina idem eccle-  
 siæ sensus elucet, quæ vindictam peccati  
 ne ijs quidem, qui in extremo vitæ discri-



mine reconciliabantur, indulgentiam cē-  
fuit; sed sanitati restitutos Deo & fidelium  
societati pœnitentię squallore satisfacere  
voluit. Ab hac igitur perpetua vniuersæ  
antiquitatis sententia cur nunc demum  
ecclesia recedat? vel hæreticorum proter-  
uiæ proculcandum relinquat dogma om-  
nium doctorum auctoritate stabilitum?  
Concilium veritatem catholicam caute &  
prudenter decreto suo contra fidei subuer-  
sores asseruit; simulque malas artes eorum  
qui ex pietate quæstum faciunt, & populi  
simplicitati illudunt, proscripsit: ita ut  
quid ab homine Christiano veritatis ac pie-  
tatis amante, tam in ipso dogmate, quam  
Concilij decreto desiderari possit, non vi-  
deam; modo nouitatis & partium studio  
animus non præpediatur.

Eadem leuitate anathema infligi putas  
ijs, qui septem Sacramenta non confiten-  
tur. Sed dic sodes, cur ecclesia catholica  
non damnet eos, qui duobus solis utcum-  
que retentis, cetera quinque vel expun-  
gunt, vel sacramentorum nomine indigna  
existimant? Tu negare non potes, Latinos  
pariter & Græcos septenarium numerum  
agnouisse à quinque retro sæculis. Vnde  
autem hanc sententiam vtrique ecclesię  
subortam existimas eo tempore quo Græ-

eorum schisma aduersus Latinos maxime feruebat? Quis eos nullas non diffidiorum causas aucupantes hac in parte Latinis tum coniunxit? Vnde hanc vtriusq; ecclesiæ obseruationem non nisi ex primitiua & apostolica traditione acceptam, & perpetuo vsu ad nostra vsque ad tempora deriuatam esse necessario sequitur. Neque opus est, vt prolixius agam post eruditissimum laudatissimumque opus Petri Arcudij Lutetiæ editum, quo consensus Græcæ ecclesiæ cum Latina tam solide ostenditur, vt nemo hærenus, quod sciam, contra hincere ausus fuerit. Si ergo angelo de cælis, nouum quid præter semel ab apostolis tradita prædicanti, anathema intentet ipse Paulus; cur nos tam profane in ecclesiæ sacramenta grassâtes anathemati subijcere dubitemus? Præcipua hæc diuinæ gratiæ instrumenta, vniuersa Dei ecclesia semper agnouit, semper exercuit; & nunc demum post quatuordecim sæculorū vsum ea nouatoribus tollere & proculcare impune licebit? Nam vt firmissimum illum etiam nostro seculo vtriusque ecclesiæ consensum taceam, sane Confirmationis, Pœnitentiæ, Ordinis, ceteraque sacramenta tam perspicue & constanter proxima apostolorum temporibus ecclesia credidit & exercuit, vt nostro de-

mum

num seculo sine manifesto impietatis crimine abrogari, negari, & violari non potuerint. Mihi controuersias post tot eruditos theologos retexere, animus non est: id breuiter ostendam, nullo modo me reprehendendum, quod antiquitatis sententiam perpetuam nouis dogmatibus prætulerim.

Confirmationis sacramentum ab Apostolis traditum omnis antiquitas semper & vbique tenuit: contra Nouatiani, id negantes & negligentes, omnium calculo sine vlla controuersia & exceptione, nouatores & hæretici habiti. Quæro ego, si tum receptissimum per omnem ecclesiam sacramentum fuit, cur nunc vt figmentum nullo veritatis fundamento nixum expungitur? Et si Nouatiani id explodentes olim omnium calculo fuerunt hæretici, quomodo Lutherus, Calvinus, cæterique sectarum patroni nunc eundem errorem errantes, ab hæresi immunes? Ad hæc, si olim ecclesia vniuersa Nouatianos iure damnauit ob violatum, aut neglectum hoc sacramentum, ideoque non nisi Chrismate confirmatos ad communionem eos recipi voluit; cur hodie temerariæ leuitatis notam meretur, si nouatores idem sacramentum exhibilantes anathe-

mate defigat? Proinde miror qui nam tu contra Meguntinos §. 108. ferreæ frontis hominem pronunciare audeas, qui dixerit; siue ex scriptura, siue ex consensu antiquitatis demonstrari posse, sacramentum Confirmationis, quali nunc ecclesia Catholica utitur, à Christo institutum esse. Ego vero non sine manifesta impietate in dubium vocari existimo, quin Apostoli, quod ipsi fecerunt, quodque vniuersæ ecclesiæ faciendum tradiderunt, à Christo magistro acceperint. Cum ergo vniuersa ecclesia inde à principio confirmationis sacramentum ab Apostolorum instituto se accepisse, & eorundem exemplo exercuisse fateatur; indubie sequitur, cōfirmationem illam à Christo per Apostolos institutam, non postea subintroducā fuisse. Ab ipsis autem Apostolis ecclesiæ traditum fuisse euidentissime patet. Etenim Clemens Alexandrinus libro, Quis diues saluandus, apud Eusebium hist. eccl. lib. 6. cap. 35. & ipse liber Clementis sub falso Origenis nomine non ita pridem à Gisle-rio editus, iuuenem quendam à Ioanne euangelista episcopo cuidam Asiatico cōmendatum commemorat; cui baptismo illuminato episcopus signaculam Domini, ut perfectam tutelam, contulit. Quo loco

baptismum & chrisma, vt diuersa sacramenta à Clemente poni, ex simili loco Stromatum lib. 2. certissimo apparet. Hinc Clementis discipulus Origenes ad Rom. 6. baptismum & chrisma conferri scribit, secundum typum ecclesię traditum: & Cornelius PP. apud Eusebium lib. 6. cap. 35. Notatum, cum in morbo baptizatus esset, postea consecutum negat, cum cætera, quę baptismũ sequuntur, κατὰ τὸν τῆς ἐκκλησίας κανόνα hoc est, iuxta ecclesię canonem, tum episcopalem obsignationem, Dic queso, à quo typum, vel canonem illum, seu regulam ecclesię traditam putas, nisi ab ipsis Apostolis? Sane Cyprianus Carthagenensis Episcopus in Africa, eodem tempore ab apostolis deducit, quod baptizati ecclesiarum præpositis confirmandi offerebantur: vt per nostram, inquit, ordinationem & manus impositionem, Spiritum sanctum consequantur, & signaculo Domini consummentur. Cypriani mente & verbis loquitur Augustinus lib. 15. de Trinitate cap. 26. Nemo discipulorum dabat Spiritum sanctum; orabant quippè, vt in eos veniret, quibus manus imponebant; non ipsi eum dabant: quem morem in suis præpositis etiam nunc seruat ecclesia. Nec minus perspicue S. Hieronymus dialogo

contra Luciferianum, cap. 4. Quod si hoc loco quæris, inquit, quare in ecclesia baptizatus, nisi per manus episcopi non accipiat Spiritum sanctum? disce, hanc observationem ex ea auctoritate descendere, quod post ascensum Domini, Spiritus sanctus ad Apostolos descendit. Cui deinde locum ex Actorum cap. 8. subiungit: quo etiam Innocentius I. celebri illa epistola ad Decentium Eugubinum utitur, ut recens baptizatorum obsignationem solis episcopis permissam doceat. Numquid tot talesque viri ferreæ tibi frontis videntur?

Sed quod tu frustra apostolicam illam & miraculosam manuum impositionem allegari existimas ad hodiernam, ut ais, Pontificiam confirmationem, eo non minus iniurius es in secula primitiua, & omnes quos laudavi Ecclesiæ doctores, quam in hodiernam Romanam ecclesiam: cum iam illo tempore visibilis ista & miraculosa donorum effusio cessauerit. Ideoque unus Augustinus reliquorum nomine tibi respondeat, tract. 6. in epist. S. Ioannis: Nunquid modo, quibus imponitur manus, ut accipiant Spiritum sanctum, hoc expectatur, ut linguis loquantur? aut quando imposuimus manum istis infantibus, at-

tendit vnusquisque vestrum, vtrum linguis loquantur? & cum videret eos linguis non loqui, ita peruerso corde aliquis vestrum fuit, vt diceret, non acceperunt Spiritum sanctum? Vides hanc peruersi cordis assertionem à S. Augustino iam olim explosam, cuius tempore miracula illa non minus, quam nunc cessarant. Neque tamen confirmationis sacramentum ideo de ecclesia tollendum censuit, quod nouatores postea fecerunt.

Eo autem rerum catholicarum plane te imperitum ostendis, quod nullam prorsus manus impositionem in hodiernæ confirmationis sacramento adhiberi affirmare non verearis. Ecclesia catholica nihil ab antiquo ritu mutauit. qualem S. Gregorij Magni sacramentorum liber iam olim descripsit, eundem Pontificali Romanum totidem verbis nunc retinet; scilicet, vbi confirmandi ad episcopum perducti coram eo in genua procumbunt, ibi leuata manu sua super capita omnium dicit: Omnipotens sempiterne Deus, &c. emitte in eos septiformem Spiritum tuum sanctum, &c. Eandemque orationem Ambrosius lib. 3. de Sacramentis cap. 2. iam suo tempore in confirmatione adhiberi solitam docet, Vnde manifestissime apparet,

quam tu frustra inter veterem, & hodiernam confirmationem, tum etiam inter diuersarum Ecclesiarum ritus discrimen fingas, quæ viris doctis in ecclesiastica antiquitate probe versatis non nisi commiserationem exprimunt.

Sed cum omnia persequi, neque huius loci, neque mei sit instituti, addo quod in hac questione præcipuum & palmarium est. Tu confirmationem meram cæremoniam, eamque liberam & indifferentem, baptismo olim coniunctam fuisse affirmas. e contra veteres omnes sacramentum hoc à baptismo diuersum existimant, & sacramenti nomine passim appellant. Atque ita longo temporum decursu, vusque perpetuo, à maioribus accepit, atque hodie etiam credit non solum Latina, sed & Græca ecclesia. Tu, vbi commodum fuerit, tuæ opinionis argumenta ex antiquitate propones: ego interim pro mea, hoc est catholica sententia, aliquot indubitata veterum testimonia afferam, quæ nullis officijs offuscari possunt. Tertullianus diabolum Christo etiam de sacramentis æmulatum scribit, præscript. cap. 40. quo loco præter Baptismum, & Eucharistiam, Pœnitentiam quoque & obsignationem chrismatis; item ordinem, & matrimonium diser-



tissime sacramentorum Christi nomine ac numero complectitur; vt & lib. 1. aduersus Marcionem, cap. 14. præcipue autem lib. 1. aduers. Praxeam cap. 5. vñctionis sacramentum diserte appellat. Cum magistro sentit & loquitur. Cyprianus epist. 72. vbi hereticorum rebaptismum propugnans ait, parum esse ijs manus imponi, ad accipiendum Spiritum sanctum; sed tunc demum plene sanctificari, si sacramento utroque nascantur. Sic episcopi concilij Africani apud eundem Cyprianum epist. 70. constituunt; De errore & prauitate venientibus dandam per omnia diuinæ gratiæ sacramenta, vnitatis & fidei veritatem. Quibus locis confirmationis sacramentum expresse non solum à baptismo distinguitur, sed eidem opponitur. S. Augustini loca multa & clarissima habentur de eodem sacramento chrismatis, ex quibus perspicue patet eum non cæremoniam indifferenter, vt tu ais, sed verum & peculiare sacramentum confirmationem existimasse quæ libro secundo contra Petilianum, comment. in psalm. 26. & tractatu in epistolam Ioannis 3. & 6. videri possunt. His duos addam antiquissimos grauissimosque scriptores, Cyrillum Hierosolymitanum, & S. Ambrosium. vterque ecclesiæ sacra-

menta initiandis necessaria explicans, peculiari sermone de baptismo, & alio peculiari de spirituali signaculo, quo post fontem confertur perfectio, vr de diuersis Sacramentis agit: vt ex illius catechesi mystagogica. 2. & 3. huius sacramentorum libro 3, apparet. Neque enim pura cæremonia, & baptismi appendicula, vt tu vis, specialem catechesin merebatur.

Præterea si confirmationis sacramentum hæreticis ad ecclesiam reuersis Spiritus sancti gratiam confert, quam ex baptismo mere formali extra ecclesiam, quippe obicem diuinæ gratiæ ponentes, accipere non potuerant; mera illa secundum te cæremonia efficacior erit, potiorque ad salutem, ipso sacramento baptismi; atque ita sacramenti defectus non validiori sacramento, sed nudæ cæremoniæ accessu emendabitur: quod quam sit absurdum, & quam omni doctrinæ & disciplinæ ecclesiasticæ contrarium, quis non videt? Omitto Africanam, & Cappadociæ, vicinasque ecclesias; quæ, vt dixi, non solo confirmationis sacramento, verum iteratione baptismi prioris vitium corrigendum pertendebant: sed catholicam reliqui totius orbis sententiam à concilijs Patribusque expositam

propono. Cyprianus partem catholicam suo argumento sic premit, epist. 76. Quæ hæreticis siue schismaticis patrocinantur, respondeant nobis, habeantne Spiritum sanctum hæretici, an non habeant? Si habeant, cur illic baptizatis, quando ad nos veniunt, manus imponitur ad accipiendum Spiritum sanctum? sed quia non habent, ideo apud nos manus imponitur, ut hic accipiant. Hinc can. 7. Laodicens, Nouatianos eiurata hæresi catholicè instructos sancto chrismate inungi, & sic ad ad sancti myst erij communionem admitti constituit. Sic Basilius magnus celebri illa epistola canonica ad Ampilochium, probans Laodicensi concilij sententiam contra Cappadoces, de Nouatianis conuersis statuendum ait, ut qui ab ipsorum baptismo accedunt ad ecclesiam, vngantur à fidelibus. Eamque Laodicensæ Synodi, & Basilij sententiam confirmavit paulo post Concilium Constantinopolitanum i. canone 7. quo etiam obsignandi & vngendi formula Græcis hodie vsitata præscribitur. Neque aliter canonem illum intellexerunt explicaruntque Romanæ Ecclesiæ præsules concilio illi suppare. Siricius ad Himerium Tarrac: Arianos, inquit, nos cum Nouagianis, alijsque hæreticis, sicut est in Syn-

odo constitutum, per inuocationem scriptiformis Spiritus episcopalis manus impositione, catholicorum conuentui sociamus; quod etiam totus oriens occidensque custodit. Similia habet Innocentius I. epist. 2. Sed omnium clarissime Leo Magnus loquitur epist. 85. Qui baptismum ab hæreticis acceperunt, sola inuocatione Spiritus sancti per impositionem manuum confirmandi sunt; quia formam tantum baptismi sine sanctificationis virtute sumpserunt. Hæc de confirmationis sacramento intelligenda quis dubitet? quo etiam nunc ecclesia catholica ab hæresi venientes veteri more suscipit. Veteri, inquam, more, idque non nisi per manum episcopi. Nam ut epilogus concilij Romani habet tom. 1. Conc. Colon. pagin. 255. iam ante dictos Pontifices Siluester Papa constituerat, ut præbyterum Arianum nemo susciperet, nisi episcopus eiusdem loci eum reconciliaret, & sacrosancto chrismate per episcopalis manus impositionem sancti Spiritus gratia, quæ ab hæreticis dari non potest, confirmaret. Concilio Romano accedunt Gallicana. Arausicanæ Synodo can. 1. hæreticos in mortis discrimine positos, si catholici esse desiderant, si desit episcopus, a presbyteris cum chrismate & benedictio-

ne confighari placuit. Sic concilium Epao-  
nense can. 16. Presbyteros, inquit, propter  
salutem animarum desperatis & decum-  
bentibus hæreticis, si conuersionem sub-  
tam petant, chrismate permittimus sub-  
uenire; quod omnes conuersuri, si sani  
sunt, ab episcopo nouerint expetendum.  
Vides confirmationis sacramentum pres-  
byteris, tantum in articulo necessitatis,  
propter, salutem animarum ab episcopis  
olim permissum fuisse. Nam extra vrgen-  
tissimam necessitatem, per impositionem  
manus fidelibus baptizatis, vel conuer-  
sis ex hæresi, Spiritum sanctum tradere epi-  
scopis tantum licet, vt habet concilium  
Hispal. 2. can. 7. Idemque supra Cypriani  
& Augustini testimonio probatum est. Et tu  
post apostolorum exempla, post vniuersa-  
lem totius primitiue ecclesiæ doctrinam  
& praxin, sacramentum, quo illa animarum  
salutem conferri censuit, in cæremoniam  
arbitratiam & indifferentem, sine iusta  
ecclesiæ censura mutari posse existimas?

Hæc de Confirmatione sacramentorum  
numero afferenda paulo prolixius scripsi,  
vt videas quam bene ex antiquitate, sine  
ferreæ frontis aut plumbei cordis nota, se  
tueatur catholica ecclesiæ, etiam vbi tu  
pessima causa eam niti existimas.

Multo igitur facilius reliquis sacramenti nomen vindicatur, quorum quædam ita sunt perspicua, ut ipsi sectæ vestre auctores in sacramentorum numero ea habuerint. Quod de penitentia fecisse constat Melancthonem apologiæ confessionis Augustanæ cap. 13. & ipsum Lutherum contra triginta duos Louaniensium articulos; tum vero catechismus minor, qui puerulis apud nos ediscendus proponitur, idem testatur: ubi inter articulum de baptismo & Eucharistia, caput de clauum potestate interiectum fuit. Si ergo pœnitentia vere est sacramentum, habens mandatum Dei & promissionem gratiæ, ut Apologia dicto loco ait, eandemque ob causam Lutherus eam sacramentum libenter confitetur; peccant sane eius affectus, qui ecclesiam catholicam eo nomine sugillant, quod non confitentes anathemate feriat.

Matrimonium quoque tacito quodam consensu Lutherani in sacramentorum numero habent, dum perpetuo sacrum coniugij statum appellant. Et cur sacramentum post Paulum Apostolum credere & vocare dubitet Ecclesia? Sane omnium temporum Patres & Doctores frequentissime ita appellant, quod vnius Augustini locis fere innumeris ostendi potest.

præsertim ex libro de bono coniugali; vt Tertullianum lib. contra Marcionem c. 18. aliquoties sacramenti nomen matrimonio tribuentem, aliosque taceam.

De sacramento Ordinis sectarum auctores Lutherus, Melanchthon, & Calvinus itidem discrepant. Ille enim cum sectatoribus Illyrico & Chemnitio, sacramentum esse mordicus negat; duo autem posteriores in sacramentorum numero habendum ostendunt. Ea scilicet vis est catholicæ veritatis, vt aduersariorum oculos quamuis nitentes penetret, suaque luce percellat. Nam ab ipsis Apostolis institutam, passimque vsitatam, vt plurima sacre scripturæ loca testantur, vniuersa Dei ecclesia suscepit, & pro vero atque indubitato sacramento semper habuit Ordinationem, quæ fit per orationes, & manus impositionem ab episcopis, quos in apostolorum locum successisse constat. Augustinus suo tempore neminem dubitasse affirmat, quin Ordo æquè sacramentum esset atque baptismus, dum ait libro 2. contra Parmenianum cap. 19. Ipsi explicent, quomodo sacramentum baptizati non possit amitti, & sacramētum ordinati possit amitti. Si enim vtrunque sacramentum est, quod nemo dubitat, cur illud non amitti-

ur, & illud amittitur? neutri sacramento iniuria facienda est. Sol mero meridie clarior non est hoc Augustini testimonio, cui nullæ hæreticorum strophæ tenebras unquam offundent. Sic Leo magnus epist. 81. magna deuotione curandum monet, ne tantæ benedictionis sacramentum negligerè videatur impletum. Idem epist. 87. contra digamorum ordinationes inuehens: Quis ergo, inquit, dissimulare audeat, quod in tanti sacramenti perpetratur iniuriam? His accedit S. Hieronymus, Vigilantium eiusque affeclas exagitans his verbis: Nisi prægnantes clericorum viderint uxores, Christi sacramenta non tribuunt. hoc est, vt eadem epistola loquitur, Christi ministerio arbitrantur indignos. Vnde eum ordinationem sacramenti nomine intellere dubium nullum est. Adderem S. Gregorij magni locum, omnium hac de re clarissimum, in 4 Regum cap. 5. nisi ille ob tenebras eius tempore ecclesiæ iam offundi captas, vt vos quidem dicitis, intestabilis vobis haberetur, qui vix primam & purissimam auditis antiquitatem. Certo credo me tam præclaris auctoribus nixum multo rectius Ordinis sacramentum cum catholica ecclesia admittere; quam tu cum Luthero eiusque affeclis, omnis antiquita-



tis hostibus ; idem neges ,

De extrema vnctione habemus Iacobi apostoli præceptum : habemus doctrinam & vsum perpetuum veteris ecclesiæ ; quam S. Anscharius Septentrionis apostolus , cum catholica fide nostris quoque prouincijs intulit , vt ex eius vita Colonię nuper edita constat . Tu veniam dabis , si antiquitati fidem potius quam tibi tanta in re tribuam , & de sacramentorum numero ecclesię iudicium tuo præferam .

Tertio dicam impingis Ecclesię Romanę , quod Ioannis & Christi baptismum confundentes anathemate defigat . Sed quid peccauit Concilium Tridentinum , si fidei depositum fideliter custodit , & catholicum , hoc est , vetus & vniuersale omnium sæculorum , omniunq; Ecclesię doctorum dogma , disertissimis sacrę scripturę verbis innixum , à nouatorum peruersione vindicat ? Quisquis Concilium eo nomine sugillare non veretur , idem sibi dictum putet à S. Hieronymo , quod Luciferiano eundem errorem erranti iam olim respondit : Ita tu peruersè religiosus , dum serui baptismò plusquam habuit tribuis , dominicum destruis ; cui nihil amplius relinquis . Nec minus grauitè se ab Augustino , quam Petilianum , obiurgari ex.

istimet, vbi ait: Baptismus Ioannis ad baptismum Christi non pertinet, nec eius pars vlla vel gradus est; alioquin aut tunc iterabatur aqua baptismi Christi, aut si baptismus Christi tunc per duas aquas perficiebatur, minus perfectus est modo, quia non datur illa, quæ per Ioannem dabatur, quodlibet autem horum impium ac sacrilegum est opinari. Quid igitur cum vniuersa Dei Ecclesia damnare formidem, eiusmodi dogma, quod ad impiam & sacrilegam opinionem viam sternit? Nec ignoreo quam operose alibi contendas ostendere, quæstionem hanc otiosam & ambiguam esse, ideoque neutram in partem debuisse determinari à Concilio. At si otiosa, cur Calvinus, Melanchthon, alijque reformatores alteram partem contra SS. Patres & Ecclesiam catholicam post Luciferianos & Donatistas resuscitarunt, & tam pertinaciter nunc etiam urgent? Illud vehementer miratus sum, quod sententiæ tuæ patronum ipsum Augustinum alibi producere non verearis, quo nemo acrius catholicum dogma aduersus sui temporis hæreses propugnauit; vt solus Tridentinæ definitioni tuendæ abunde sufficiat. Sed mihi professionis meæ rationem reddere propositum est, vt non temere me antiquitatem

tem contra nouitates, vniuersitatem contra priuatas opiniones secutum ostendam; non vt contentionis ferram cum quoquam reciprocem.

Cæterum hisce tanquam leuioribus, & vtcumque ferendis multo iam grauiora, & plane intoleranda subiungis: quæ non solum aures Batauas siue Saxonicas, sed etiam Græcas offendant. Ea sunt, Primatus supra reliquam omnem Ecclesiam Pontifici Romano iure diuino assertus; adeoque infallibilis Spiritus sancti assistentia eidem, vt toti familiæ Christi præfecto, & ecclesiæ sub Christo Domino capiti supremo, in rebus fidei totius Ecclesiæ consilio ac nomine definiendis, attributa. cui adiungis mutilationem Eucharistiæ, siue communionē sub vna specie, & missam sine cōmunicantibus; quam Lutherus angularem vocat, ipsique diabolo adeo absurdam & impiam visam asserit, vt nocturno congressu validissime eam oppugnarit, & abrogandam esse Luthero planissime persuaserit. neq; alia solemnīs Liturgiæ vna cum priuata tollendæ ratio illi fuit. Quocirca quid eiusmodi magistri auspicijs atque auctoritate Lutherani & Calviniani reiiciant, non magnopere mihi curādum existimo: dummodo id cum primitiæ ecclesiæ vniuersali

sensu & praxi conueniat; quod in hisce non minus quam præcedentibus articulis liquido ostendi potest.

Nam Romanæ ecclesiæ primatum Græci ante Imperij diuisionem, & postea florente Orientis Imperio, diu ante schisma & secutam inde Turcicam seruitutem, agnouerunt. Irenæus Græcus scriptor potentior illam principalitatem Ecclesiæ Romanæ, ad quam, ait, necesse est omnem conuenire ecclesiam, hoc est, eos qui sunt undique fideles, non ab humano priuilegio, sed à fundatione & traditione Apostolica accersit. Nicæni Patres cum ad Romani episcopi exemplum Patriarchalibus ecclesijs prerogatiuas suas can. 6. cōfirmant, non iuris humani priuilegium, sed antiquos mores, & veterem, hoc est, apostolicam traditionem obdunt. Eundem primatum, consentur Patres synodi Constantinopolitane can. 3. ubi regiæ urbis Episcopo secundum honoris locum decernunt. In Ephesini Concilij actis Cyrillus Alexandrinus de Nestorij hæresi recens tum exorta ad Cælestinum PP. refert, longa Ecclesiarum consuetudine persuasus, ut ipse testatur. Eidem sedis Romanæ authenticam, hoc est supremam & liberam pro arbitrio agendi auctoritatem, & loci sui vicariam

potestatem confert Cælestinus ; vt sententiam , qua Nestorium circumscripserat , eo efficacius potentiusque exequatur . Vnde nam illa authentia sedis Romanæ , ab humano , an diuino Iure ? Certe siS. Prosperum audiamus con. collat. cap. 41. Cælestinus Cyrillo ad exsecandam Nestorianam impietatem Apostolico auxiliatus est gladio . In eodem Concilio parte 2. act. 2. Philippus presbyter gratulatur synodo , quod lectis Cælestini literis sancta membra sancto capiti se exhibuerint . Caput autem totius fidei , inquit , & Apostolorum est B. Petrus . Vides puto dignitatem capitis , sine primatum ecclesiæ Romanæ B. Petro Apostolo , hoc est iure diuino , niti . idque luculentis verbis mox idem Philippus copiosius declarans ait : Nulli dubiū , immo seculis omnibus notum est , quod sanctus beatissimusque Petrus , Apostolorum caput & princeps , fideique columna , & Ecclesiæ Catholicæ fundamentum , à Domino nostro Iesù Christo saluatore humani generis ac redemptore claues regni accepit , soluendique ac ligandi peccata potestas ipsi data est : qui ad hoc vsque tempus , & semper in suis successoribus viuit , & iudicium exercet . Huius itaque secundum ordinem successor & locum tenens sanctus beatissimusque Papa.

noster Cælestinus episcopus, nos ipsius præsentiam supplentes ad hanc sanctam synodum misit. Hæc in actis Ephesini Concilij. Verum quæ nulli tum dubia, sed sæculis omnibus nota, nostro tamen tempore ut dubia, & antiquitati incognita, vel primo loco inter absurdas Romanæ ecclesiæ assertiones ponis, tractatu tuo contra Moguntinos §. 142. Dic bona fide, mi Calixte, cui tutius credam, tibi neganti, an affirmanti Concilio? Accedit quod Iuvenatis Hierosolymitanus ibidem in act. 4. affirmat, morem fuisse inde ab ipsis deriuatum traditumque Apostolis, ut sedes Antiochena à Romana dirigatur, & apud eam iudicetur. Vnde act. quinta sancta Synodus ultimam de Ioanne Antiocheno sententiam Cælestini iudicio reservat. Tunc Apostolicam illam ἀποστολικὴν καὶ θεοῦ δόξαν ad humanum vel diuinum ius, hoc est, ad Petri primatum referendum existimas? Chalcedonensis synodi acta eundem primatum Ecclesiæ Romanæ, in Petrum Apostolorum principem collatum, innumeris propemodum locis confirmant. Omitto quæ in præliminaribus epistolis Imperatorum & Augustarum habentur; quod priuata vel domestica testimonia ex Occidente prolata possint videri; ea scilicet quæ epi-

stola 15. 25. 26. & 33. leguntur. Sane actione 1. Beatissimus & apostolicus episcopus urbis Romæ omnium ecclesiarum caput vocatur, quia nimirum sedem apostolicam gubernat. Act. 3. Dioscorus episcopatu priuatur à Leone PP. per legatos & sanctam synodum, idq; ope beatissimi & gloriosissimi Petri Apostoli, qui est petra, & crepido Ecclesiæ catholicæ, & rectæ fidei fundamentum. Depositionis causam præcipuam non semel adducunt Patres, quod contra ipsam sedem apostolicam latrarit, & in sanctum Leonem excommunicationem promulgare conatus sit; hoc est, contra ipsum illum, cui vineæ custodia à Salvatore commissa est; ut habet totius synodi relatio ad Leonem: quem vocis B. Petri interpreter omnibus constitutum, concilio ut caput membræ præfuisse aiunt. Et quamuis act. 16. ex Constantinopolitani concilij decreto, secundum dignitatis locum Regiæ urbis episcopo confirmant, nihilominus primatum & eximium ac præcipuum honorem Romanæ sedi conseruant: quod in eadem relatione Patres ita explicant, ut apostolici splendoris radio, quo Roma fulgebat, ecclesiam Constantinopolitanam illustrari, eiusque bonorum participatione ditari petant. Vides vir optime,

quid de primatus Romani origine ac fundamento Orientalis ecclesia primis quinque seculis crediderit, priusquam mabitionis vertigine in schismatis barathrum præceps ageretur. Nam post inuasam totius Illyrici, tum etiam Siciliae & Calabriae iurisdictionem ecclesiasticam, Constantinopolitanum Patriarcham sedi Apostolicæ non solum æquare, sed etiam præferre conati sunt, Nilus, Barlaamus, alijque schismatici, non solum liuore, sed etiam imperitia, & veteris ecclesiæ disciplina ignorantia excæcati. Quotiescunque tamen veritatis & vnitatis amor Græcorum animos subijt, eâdem cum orthodoxa antiquitate sententiam professi sunt. Vnde in Synodo Florentina sess. 25. cum Latini primatum Pontificis sacra scripturæ definitioni didis-que sanctorum inniti scripsissent; Græci, ut suis quoque patriarchalibus priuilegijs confluerent, addi voluerant; Papam sua priuilegia habere iuxta canones, & dicta sanctorum, sacramque scripturam, & acta conciliorum. Vnde mox in decreto vñionis primatus pontificis iure diuino asseritur: quippe cui in B. Petro pascendi, regendi, & gubernandi vniuersalem ecclesiam à Christo. Iesu Domino nostro plena potestas tradita sit. Hæc Græca ecclesia ex maiorum



suorum & totius antiquitatis sensu ; quæ hoc loco pluribus a me asseri necessum non est.

Nec magis Græcos offendere potest Communio sub vna specie , quam ipsi æque ut Latini iam olim tenuerunt , atque etiam hodie passim retinent . Nam recens baptizatis infantibus de solo calice guttam instillant ; ægrotis autem & moribundis sola panis specie viaticum exhibent : vtrisque tamen verum & integrum Eucharistiæ sacramentum hoc modo se tradere non dubitant , Idem ceteri omnes ad orientem & meridiem Christiani, præsertim Abassini, antiquo & perpetuo suæ ecclesiæ more faciunt . Neque Eucharistiam mutilari existimauit antiquitas , cum fidelibus particulas panis consecrati ad priuatam communionem domum asportandas daret , vel ad anachoretas in eremum mitreret . Omnium vero clarissime vtriusque ecclesiæ consensus perpetuum ostendit communio ex præsanctificatis , qua Græci feriis quadagesimalibus, Latini sola feria sexta maioris hebdomadæ vtuntur, ex antiquissimo vtriusque instituto: neque tum quidquam de sacramenti mutilatione suspicabantur .

Liturgiam sine communicantibus Græcis iuxta ac Latinis in usu nunc esse, doctis-

fimi eius nationis viri, & ipse vsus quem passim per Italiam cernere est, testantur; eoque falsam Chythrqi criminationem refellit Allatius, cuius librum apud Batauos editum, tibi iam visum lectumque non dubito. Sed ne vocum ambiguitate fallamur dicam tibi, mi Calixte, quid hic tum in ceteris Ecclesijs vrbicis, tum præsertim in maioribus basilicis fieri obseruauerim; vbi festis diebus, hoc præsertim anno, in tanta exterorum frequentia, myriades hominum ad sacram communionem confluunt. Ibi summo mane Parochus, aut alius sacerdos, ad destinatum huic functioni altare dominici corporis sacramentum consecrat, ea particularum multitudine, quæ populo fidelium, communicando eo die suffectura videatur, communicant tum de eiusdem sacerdotis manu quotquot sacro officio adsunt: ceteri qui & ipsi communicaturi toto deinde antemeridiano tempore infinito propemodum numero citius tardius templum accedunt, primum missæ siue liturgiæ officio adsunt, quod ob populi frequentiam & commoditatem à diuersis sacerdotibus ac diuersa altaria subinde celebratur: eoque finito ad alterum illud altare, quod huic ministerio destinatum dixi, communionem accipiunt. Tu ne sacerdotem illum

fine communicantibus missam celebrasset; aut eos qui celebranti adfuere, cum sacerdote suo non communicasse affirmabis? non dicam communionem precum & unitatem Spiritus, sed ipsa participatione specierum sacramentalium; quamvis ad aliud altare de alterius sacerdotis manu eam acceperint? Puto te non dicturum; nisi vnam ecclesiam, vnum altare, vnum sacrificium, vnum sacerdotium, vnam inter omnes fideles vnius eiusdemque panis communicationem, & vnam vnius corporis cum vno capite vnionem negaueris. quam negare certe non potest, nisi qui factionum studio Christi ecclesiam plane ignoret. Tu vero, mi Calixte, numquid omnes qui olim sacrae Liturgiae officio aderant, de Eucharistia, quae per singulas synaxes celebrabatur, communicasse existimas? Neque hoc puto dixeris; qui antiquissimorum Patrum de communicantium infrequentia querelas non ignoras. Non laudans dico, sed ut necessitatis legem etiam tunc abfuisse ostendam.

Sed quoniam tu ea quae in Catholicorum Liturgia minus probanda censes exposuisti; liceat mihi eadem libertate de noua vestra vicissim ex te perquirere: qua pontificiae missae errores sublato vos quidem,

dicitis; nos omnem veteris Liturgiæ vel græcæ vel latinæ faciem abolitam euerſamque certo ſcimus. Non dicam de Caluiniſtis, Anabaptiſtis, Socinianis, quos præter externos ritus ipſius quoque ſacramenti veritatem ſuſtulſiſſe ingenuè fateris: ſed Lutheranorum miſſa, ſi tamen hoc nomine appellanda, quid præter merum nomen apud vos habet? quamvis & hoc ferme interciderit. Synaxes illæ ſolemnes, quibus vnio Eccleſiæ cum Chriſto capite per oblationem communionemque ſanctiſſimi corporis eius fouetur ac nutritur, ita olim omnibus communes erant, vt ijs non adefſe piaculum duceretur grauiffimum, & pœnæ ſuppliciique loco eſſet, ſi quis vel integræ actioni, vel parti præcipue intereſſe prohiberetur, quæ Canonis nomine nunc appellatur. Eo enim cum poſt orationes aliquot & lectiones ſacras, earumque explicationes peruentum eſſet, præter catechumenos & energumenos, etiam pœnitentes ſanctuario excludebantur. Tota hæc actio apud vos in concionem ſeu *ἑκκλησία* mutata eſt: huius deinde diſmiſſa concione appendicula quædam eſt qualiſcunque illa miſſa, ſeu communionis formula, veteris Liturgiæ in locum ſubintroducta; quam ceteri ea die

non communicaturi parum aut nihil ad se pertinere putant. Ita nunc Concio caput est Synaxeos, cuius pars ex veteri ecclesie instituto & preparatio esse solebat.

Sed profecto ut te Missa catholica sine communicantibus offendit, ita mihi multo magis communio vestra sine Missa displicet. Quod enim missę vestigium in vestra illa actione, præter externa quedam, vestes dico, & vasa, & nonnulla inania catholice Liturgie imitamenta? Quomodo enim missa sine oblatione? quomodo oblatio sine sacerdote? quomodo sacerdos sine ordinatione episcopi? quomodo episcopus sine legitima & apostolica successione? vel quomodo verum sacramentum corporis Christi, extra Christi ecclesiam? Manifestum enim est, ut ait S. Cyprianus, apud omnes hereticos Spiritus sancti gratiam non esse, nec eorum sacrificia, quamdiu heretici sunt, posse Deo placere: neque spiritualis gratie sanctificatione sacrificijs eorum tribui, qui offerunt ab ecclesiastici corporis unitate disuncti. Solius enim Ecclesie Deus delectatur sacrificijs, quam sacrificiũ Deo facit unitas spiritualis: ubi & fidei veritas nullacredit in Trinitate distantiam, & pacis tenacitas fraternam servat in caritate concordiam. Attende tibi, ait lex Deutero-

nom. x i f. ne offeras holocausta tua in omni loco quemcunque videris; sed in loco quem elegerit Dominus in vna tribuum tuarum. Audi, quis sit locus electus, ait S. Augustinus Rogatiano Donatistæ, & quæ tribus Domini. In psalm. 131. habes: quoniam elegit Dominus Sion, elegit eam in habitationem sibi. Hic est locus electus, hic mons sanctificatus, hæc ciuitas supra montem posita, vt abscondi non possit, hæc radix catholica, hæc vitis fructifera longe lateque diffusa: & ego, inquit, dico tibi: Attende tibi ne offeras in omni loco, idest, in omni heresi, & dicas; & hic Deus & ibi Deus est. Qui alibi præter Ecclesiam colligit, ait Cyprianus, Christi Ecclesiam spargit. vnica enim sponsa Christi vnæ sponsi domum nouit, vnius cubiculi castitatem casto pudore custodit. Stare tu & viuere putas posse de ecclesia recedentem? sedes sibi alias & diuersa domicilia condentem? Sacramentum Paschæ nihil aliud in Exodi lege continet, vt agnus qui in figura Christi occiditur, in domo vna edatur. Caro Christi & sanctum Domini cijci foras non potest: nec alia vlla credentibus præter vnæ ecclesiam domus est. Vna autem ecclesia, vna & intus esse & foris non potest. Qui enim de ecclesia exierit

runt, certe in ecclesia non sunt. ideoque quæcunq; extra ecclesiam tenentur & sacramenta, & scripturæ, ad speciem tenentur, non ad salutem: cum ista in sola ecclesia catholica salubriter habeantur, ubi fides cum caritate retinetur. Extra hoc corpus, inquit S. Augustinus, neminem vivificat Spiritus sanctus, per quem caritas Dei diffunditur in cordibus nostris. neque enim particeps est divinæ caritatis, qui hostis est unitatis.

○ Tu vero optime nosti, quæ unitas sit apud eos qui ab ecclesia catholica recesserunt: ubi ut omnes à catholicis, ita à seipsis singuli ferali odio dissident. Etenim ut Sampsonis vulpeculæ caudis colligatæ Capite in diuersa tendebant, ita illi solo catholice veritatis odio coniuncti cætera omnia toto cælo differunt. Quinimo sola unionis conciliandæ mentio, pacisque studium omnium odio in se concitando sufficit. Hic te ipsum tibi propono, qui non meminisse non potes, quomodo Turonensi colloquio Augustani tui ad Calvinianos te reiecerint, tum vero nuperi librorum indices ostendunt, quam non fraterne ijdem congregales tui scriptis non vno loco divulgatis te exagitent. Ita dum nescio quod ecclesiæ simulacrum ex omni sectarum

schismatumque genere, tanquam Babylonici colossi pedes ex ferro, testa, lutoque conflare conaris, illi ipsi qui conglutinari nec possunt nec volunt, te oleum operamque perdentem cōuicijs contumeliisque traducunt: adeoque dum omnium esse cupis, nullius es; & ecclesia, cuius ideam tibi fingis, spatio ferme imaginario coarctatur. Quid enim magis dissonum ab ipso fidei symbolo: quid religionis Christianæ principijs magis aduersum dici aut cogitari potest, quam ut puriorem Ecclesiam ad Holsatiæ nostræ angulum, & vnam atque alteram Ducatus Brunsvicensis præfecturam restringere quis velit? cæteras orbis prouincias erroribus & superstitionibus oppressas ad veritatis lumen caligare existimet?

Agnosco sane Academiam vestram singulari quodam Dei beneficio, & sapientissimorum Principum cura, viris eruditis & accurata docendi ratione ceteris per Septentrionem scholis palmam præripere; hælluationes & morum corruptelam, bonæ mentis pestem, obnixe auersari; tum quod præcipuum duco, maiorem sacræ antiquitatis cognitionem ad fidei controuersias disceptandas adhibere: toto tamen cælo abest, ut Catholicæ ecclesiæ ad



inuidiam obduci possit . imò quantiscumque doctrinæ præsidij feliciter instructa, hoc vno est infelix, quod catholica non est; dum Lutheri partem sequitur, scissuras contra vniuersi orbis vnitatem fouendas suscepit.

Extrema malorum sunt hæresis & schisma, vnde præsens fidei iactura & ineuitabile salutis naufragium sequitur. ab hac peste nemo vnquam pius, nemo sapiens vitiatæ disciplinæ & corruptis ecclesiæ moribus remedium quæsiuit. Ipsa enim separatio impios ostendit, vt ait Fulgentius, quæ tales ecclesiastico corpori non socios, sed aduersarios facit. Neque enim à conuentu ecclesiasticæ vnitatis corpore separarètur & loco, nisi prius ab ecclesiastica fide discederent corde corrupto. Habet quidem ager Dominicus præter boni seminis frugem etiam zizania, eaque, proh dolor, copiose ab inimico homine super seminata. verum non ideo segetem proteri aut exuri iubet pater familias; sed zizania cum ipsa fruge ad messem vsque tolerat. Area hæc Domini ventilabro permundanda paleas frumento mixtas vsque in finem sæculi sustinere non recusat. Exurentur suo tempore zizaniorum fasciculi sine messis detrimento: illæso tritico paleæ dispergentur.

Neminem intra Ecclesiam catholicam recte credentem, & bene viuentem aliena peccata maculant. Animæ ac salutis suæ iniurius est, qui palearum odio aream deferit; cum frumentum non nisi ex area congregetur in horreum.

Nec despicienda est Christi sponsa, quod diurno peregrinationis æstu fusca; quod decolorata longæ serenitatis sole; quod etiam seculari puluere aspersa nunc videatur. nigra quidem illa, sed formosa: cuius gloria omnis interna cum sit, æmuloꝝ oculos, in nequos rugasque cutis externæ tantum intentos fallit.

Sed bene est, quod inanis illa & fictitia ecclesiæ larua, quam sectarum auctores magna puritatis specie venditant, nullis furcorum pigmentis hætenus ita incrustari potuit, quominus suam prodat deformitatem: quippe cui nihil solidæ pietatis & sanctimonix subesse statim deprehendit, qui paulo penitus introspicit. Nam quod tu seueritatem disciplinæ ecclesiasticæ fratrum Bohemicorum exemplo reduci desideras, ea vetus querela est, & inane votum, à Melanchthone ante annos CXV conceptum, vagiente adhuc in cunis Lutheranismi: quem si senescentem nunc adulta confirmataq; licentia ad obedientiam

tiæ iugum retrahi posse existimas, sane falleris. Excutere iugum, non mutare voluit; omnemque conscientia coercendę rationem carnificinam arbitratur. Cur enim non de veteri pœnitentium disciplina potius restituenda cogitas? cur non vitæ religiosæ, & consiliorum euangelicorum observationem in vsum reuocare studes? Sed ita fit; filius ille adolescentior cum domum mensamque paternam reliquisset, dissipata substantia peregre ad porcorum filiquas se proiecit. Ita post conculcatas & exustas à Luthero Canonum leges, Patrumque regulas, post proscriptos episcopos, post euerfa sanctioris vitæ asceteria, monitores correctoresque Bohemicos desideratis: quasi tam altum profanatae religionis vlcus tali cataplasmate persanari possit.

Ego vero, mi Calixte, multo opportuniorẽ medendi modum tibi patriæque nostræ proponerem, si sanis consilijs locus relinqueretur; maiorque veritatis pietatisque restaurandæ, quam factionum propugnandarum cura & sollicitudo esset: cogitarentque Principes, quæ mala in Rempubicam, quæ vitia & corruptelæ in mores vitamque priuatam, ex religio-

nis subuersione profluxerint: quam timendi sint ipsis hypocritæ, & fanatici homines, qui defecatissimam religionis puritatem professi, diuinas humanasque leges promiscua facilitate proculcant; & sceleribus atque parricidijs eo grassantur, ne à quoquam dependeat, vel coerceri possit effrenis quiduis agendi licentia. Merito Ecclesia catholica mater Christianorum verissima, inquit Augustinus, non solum ipsum Deum, cuius adeptio vita est beatissima, purissime atque castissime colendum prædicas; sed etiam proximi dilectionem atque caritatem ita complecteris, vt variorum morborum quibus pro peccatis suis animæ egrotant, omnis apud te medicina præpolleat. Tu cum ætates gradusque omnes officijs suis instruas, doces etiam Reges prospicere populis, mones populos se subdere regibus; quibus honor debeatur, quibus affectus; quibus reuerentia, quibus timor, quibus consolatio, quibus admonitio, quibus cohortatio, quibus disciplina, quibus obiurgatio, quibus supplicium, sedulo doces; ostendens quemadmodum & omnibus omnia, & omnibus caritas, & nulli debeatur iniuria. Deinde vitæ spiritualis magistram eandem prolixè cele-

brans, addit præclare: Quod utinam isti hæretici (ecclesiæ scilicet catholicæ contemptores) intelligere si valerent, nusquam profecto Deum nisi apud te, atque in tuo gremio, minime superbi & bene-pacati venerarentur. Ad hanc tutius confugies, mi Calixte, quam ad fraternitatem Bohemicam, si ecclesiæ doctrinam disciplinamque apud nostros restitutam cupias.

Ad hunc salutis portum te inuitare non desinam, ad quem sedulo peruestigandum tua in primis opera me excitatum profiteor. Nam Romanam ecclesiam, vnam illam, sanctam, catholicam, & apostolicam esse non tam facile mihi licuisset perspicere, nisi antea tuo ductu certo credidissem, eam non Antichristi sedem, & Babylonicæ meretricis lupanar, sed vere ecclesiam etiam nunc esse, & salutis spem pie in ea viuentibus neutiquam denegandam; eo quod precipua fidei capita, quibus fundamenti instar salus nostra innititur, salua & immota retineat. De reliquis, sin absque partium studio esset, vnionem aliquam, vel saltem syncretismum iniri posse existimabas. Ad hæc multa temerario illo reformationis tumultu abrogata dolebas,

quæ cum magno pietatis emolumento potuissent retineri. multa quoque Ecclesiæ catholicæ falsa, & absurda fatebaris affingi, quæ aut plane ignoret, aut ipsa improbet. Ita tu Hermæ vialis instar in biuio defixus, digito intento viam qua ad ecclesiam catholicam pergerem mihi subindicasti.

Quod autem à sententia, quam maturo consilio post longas atque ardentissimas preces amplexus sum, tuo colloquio me dimoueri posse existimas, id vero fiet, ubi aliam scripturam, alia Conciliorum, acta., aliam ecclesiasticam historiam, & diuersa Cypriani, Augustini, aliorumque Patrum scripta, ab ijs quæ certa & indubitata Romæ consului, mihi exhibueris. Nam elusiones, & subterfugia Spalatenfis, & similium mangonum, in tam perspicua antiquitatis sententia admittere non possum.

Interim te, mi Calixte, per Deum & Christum salutis nostræ auctorem oro atq; obsecro, vt animæ tuæ negotium tibi commendatissimum habeas; serioque cogites de ecclesia Dei, columna & firmamento veritatis, qualem eam ab Apostolis, virisque apostolicis fundatam, totoque orbe diffusam, prima quinque secula viderint:

quibus illa fidei dogmatibus, quibus sacramentis, qua disciplina, quo regiminis modo tunc fuerit instructa; quanto studio puritatem & vnitatem suam aduersus hereses & schismata vindicarit. Eius statum faciemque vbi diligenter inspexeris, tum sine odio studioque partium dispice, quam omnia illa nunc salua supersint in Romana, cæterisque cum Romana communicantibus ecclesijs; eamque & nominis & dogmatis catholici hæredem, atque apostolici depositi custodem agnosce. Econtra perpende, quam truculenter & impie in matris viscera seuerint infausti illi reformatores; vt faciem eius deturpauerint, artus dilaniarint: vt pro veteri catholica doctrina suos quique substinuerint errores & deliria: vt sacram scripturam non secundum perpetuum & vniuersalem sensum & consensum SS. Patrum explicent, sed ex cerebri sui libidine nouis & priuatis interpretationibus peruertant: vt sacramenta eorumque ritus abrogarint; Apostolicas traditiones, omnemque veterem disciplinam, Patrum & conciliorum saluberrimis constitutionibus firmatam, sustulerint, vel eneruarint; consilia euangelicæ & vitæ sanctioris studia exploserint; hic

rarchiam ecclesiasticam, & omnem præcipiendi & parendi distinctionem confuderint. Sublata Episcoporum auctoritas, nudo tantum nomine ad ditiones reditusque ecclesiarum occupandos nonnupiam seruato. Ordines presbyterorum, & diaconorum, ceterique officiorum & ministeriorum gradus abrogati: denique noua ecclesiæ facies introducta omaibus sæculis ignota; ad cuius conspectum quotquot inde ab Apostolis fuere doctores, Patres, episcopi, virique sancti, velut ad monstrum & errorum lernam nunc cohortescerent.

Et quoniam te virum doctum, & antiquitatis sacræ vnum fere præ cæteris studiosum compello; cogita quanta Septentrioni nostro ex infelici illa religionis subuersione ignorantia cæcitas incubuerit. Patrum, & ecclesiæ doctorum non scripta tantum sed nomina ipsa ignota non solum vulgo, sed ijs qui in ecclesijs scholisque docendi munus sustinent. Si quæ forte cuiquam nota aut lecta, ex rhapsodis & ecclesiæ perduellibus ea tantum consarcinantur loca, quæ ad veritatem oppugnandam vtcumque facere videntur. Scis quali librorum suppellectile mi-



nistri & prædicantes apud nos instructi;  
ex quibus postillarum lacunis, illi pasto-  
res doctrinæ pabulum crudum indige-  
stumque gregi suo proponant. Contra  
si publicas priuatasque bibliothecas hic  
inspicias, si studia cordatorum hominum  
expendas, statim vides, quam omnia ad  
primitiue ecclesiæ mentem doctrinamque  
intelligendam explicandamque tendant.  
Libri & monumenta antiqua, præsertim  
sacra, summo studio & impensis maximis  
vndique parantur; & in ijsdem publica lu-  
ce donandis doctorum hominum desu-  
dat industria. Ita nuper Græcorum Patrum  
in Prophetas commentarijs, alijsque in  
vetus Testamentum quas vocant catenis  
non vno volumine comprehensis, immo-  
rientem vidi optimum doctissimumque  
Corderium, alios concilijs antiquis, & SS.  
Patrum operibus ab interitu vindicandis;  
alios historiæ ecclesiasticæ annalibus pro-  
cudendis occupatos noui, & ne quid in te-  
nebris lateat, quo fides catholica illustrari  
possit, sunt qui veterum Christianorum  
cœmeteria cryptasque martyrum ingenti  
Romæ subterraneæ opere descriptas in-  
lucem edant. Ita vnus omnibus antiqui-  
tatis retinendæ amor, nouitatis auersatio,

Eadem mihi nouæ sectæ deferendæ, eadem antiquæ fidei amplectendæ causa. ad quam te & Vossium nostrum iterum atque iterum inuito, certissimo æternæ salutis lucro, quod extra Catholicam Ecclesiam frustra speratis. Hoc tandem, mi Calixte, rogo, quod ille in simili causa apud S. Augustinum; si institutum & exemplum meum piget imitari, noli aduersari. Vale. Romæ, Anno Iubilei M D C L Kal. Septemb.

---

## EPISTOLA GEORGII CALIXTI

Ad Christophorum Ranzouium

*Salutem ab auctore salutis.*



ENEROSE Vir, domine & amice longe carissime, quoties huc venerunt, qui ex Italia redirent, toties de te sciscitatus sum. Fecit enim tuum pietatis, virtutis, & eruditionis studium, cuius hic luculenta specimina edidisti, ut te in oculis geram, & de incolumitate tua sollicitus sim; certa spe nixus, te communi nostræ patriæ magno ornamento insi-

gnique emolumento breui fore . Vt autem fieri solet, alij de te nihil referre poterant, alij nunciabant te Romæ degere, & familiaritatem contraxisse cum Henrico Iulio Blumio, nostræ olim disciplinæ alumno . Cuius rei certiores nos faciebat haud ita pridem Franciscus Henricus VVitzendorpius, patritius Lüneburgensis, nisi mihi memoria imponit, cui iam senescens, quod talia attinet, non semper possum fidere . Sed nuper etiam non nemo hac transiit, qui me quidem alloquutus non fuit, nec mihi innotuit, sed alijs narravit, te admodum familiarem factum Lucæ Holstenio, & nonnullis Iesuistis, qui multoties tibi scrupulos iniicerent, & dubia mouerent, vt propemodum inciperes vacillare, & religionem pontificiam reformatæ anteferre . Venit id ipsum ad aures nostri Vossii, eiusque animum vehementer perculit, vt ad me quoque deferret . Commouebar equidem, fateor, aliquantulum : sed cum me recolligerem, & prudentiam vimque ingenij tui expenderem, & Vossium bono animo esse iussi, & ipse fui; non ignarus, quanta illa tibi diuinitus concessa, & quam frequenter fallant, & plane infidi nuncij sint rumor.

res . Non potes ignorare , inter omnes partes , in quas hodie , proh dolor , scinditur populus Christianus , Pontificiam plurimis superstitionibus , corruptelis , figmentis , & nouitatibus scatere : inter quas etiam est , qui hodie celebratur Iubileus , antea apud Christianos inauditus , & deum ante annos CCCL à Bonifacio IIX. homine improbo institutus . Quamquam hoc malorum minimum videri possit , si cum dictatibus Hildebrandicis aliquanto antiquioribus comparetur . Qui Pontificijs se iungit , cogitur , se separare ab omnibus alijs Christianis , qui sunt per totum orbem terrarum ; & quidem ob causas aliquando non admodum graues . Cogitur enim anathema illis dicere , qui Purgatorium non admittunt , qui septenarium numerum Sacramentorum in dubium vocant , qui baptismum Ioannis & Christi eundem fuisse non fatentur . Iam quod attinet primatum Pontificis de iure diuino , eiusque infallibilitatem , mutilationem Eucharistiæ , & Missam sine communicantibus , hæc talia sunt , vt à Christianis Græcis , Lutheranis & Calvinianis , quemadmodum appellamus , reijciantur : licet ipsi propter eiusmodi reiectionē siue

improbationem à Pontificijs anathemate  
feriantur. Græca Ecclesia sicut sub iugo ty-  
rannico gemit, & dira seruitute premitur .  
ita paulatim ignorantia quadam oppri-  
mitur, & necessaria ad iudicium de doctri-  
nis controuersis ferendum eruditione de-  
stituitur . Calviniana hinc magnam ma-  
culam contrahit , quod contra disertam  
Seruatoris adsertionem corporis sanguinis-  
que Dominici in sancta Eucharistia præsen-  
tiam inficiatur . Lutherana , quæ dogmati  
vbiquitatis inherescit , vix minorem , dum  
hunc satis crassum errorem tuetur & ob-  
trudit . Mi nobilissime Ranzoui, ausim affir-  
mare , vix alibi ecclesiam inueniri melius  
comparatam, quam in nostra patria , & hic  
in Ducatu Brunsvicensi , ditionis VVulfe-  
butenicæ & Cale'mbergicæ . Exulant enim  
inde non modo superstitiones & corrupte-  
læ pontificiæ , sed etiam Calvinismus , qui  
præsentiam in Eucharistia negat , & illau-  
dabile dogma vbiquitatis . Contra insci-  
tiam quoque in Academia pugnamus ,  
quantum possumus , & optimæ eruditio-  
nis studia alias fugientia retinere cupimus  
& stabilire . Scis etiam pro pietatis & san-  
ctimonix studio nos satagere , & quod do-  
ceamus absque eo gratiam Dei, & salu-

tem firmam, & indubitatam subsistere non posse. Superamur tamen fateor, quod sceleritatem disciplinæ ecclesiasticæ ad pietatem omnino facientis attinet, à Fratribus Boemicæ confessionis. Cæterum tuo consilio & prudentia & auctoritate in patria nostra, quæ adhuc desiderari possint, aut emendari postulent, aliquando suppletum, & correctum iri spem omnino certam concepi. Quæ ne fruster, faxit Deus Optimus Maximus, tibi que inspiret, quæ huc faciant, & ad illustrandam diuinam gloriam, & promouenda patriæ ecclesiæ rei que publicæ emolumenta. Si quis autem scrupulus iniectus, ei quæso locum concedere noli. & si forte remouere totum nondum possis, ita suum iter institue ut in reditu nos inuisas: nullus enim dubito, per auxilium diuinum, & mutuam nostram collationem facile sublatum iri. Bene vale & age feliciter nostri memor, quemadmodum nos tui. Ex Academia Iulia, VI. Maij. C I D I D C L.

Generositati tuæ addictissimus

GEORGIUS CALIXTVS

